

AS sekat import minyak sawit FGV? Tidak beri impak signifikan kepada industri Malaysia
Astro Awani
01 Oktober 2020

KUALA LUMPUR: Sekatan segera Amerika Syarikat (AS) terhadap import minyak sawit Malaysia dan produk berkaitan daripada FGV tidak memberi kesan signifikan kepada industri itu.

Sebaliknya, pedagang kelapa sawit David Ng berkata jika dibandingkan dengan China dan India, jumlah kuantiti import kelapa sawit AS adalah jauh lebih sedikit iaitu hanya 50,000 tan sebulan.

Katanya, India dan China masih lagi menjadi pengimport terbesar minyak kelapa sawit dengan 200,000 hingga 300,000 tan sebulan.

"Melihat kepada jumlah eksport minyak kelapa sawit ke AS, negara itu hanya mengimport minyak sawit untuk penggunaan bahan api bio sahaja.

"Kenyataan yang dikeluarkan oleh Jabatan Kastam dan Perlindungan Sempadan (CBP) AS jelas menyatakan bahawa sekatan itu dikenakan ke atas semua produk berkaitan minyak kelapa sawit untuk jangka masa pendek ini," katanya kepada Astro AWANI di sini, pada Khamis.

AS mengenakan sekatan segera terhadap import minyak sawit dan produk berkaitan dari sebuah syarikat Malaysia selepas siasatan selama setahun didakwa mendedahkan berlakunya penggunaan buruh paksa dalam proses pengeluaran berkenaan.

CBP dalam kenyataan mengeluarkan arahan untuk menahan kemasukan produk sawit dan minyak sawit dari FGV Holding Berhad di pelabuhan mengikut undang-undang persekutuan yang melarang import barangan dihasilkan oleh buruh paksa.

Dalam pada itu, David Ng melihat harga minyak sawit (CPO) Malaysia dijangka terus stabil suku keempat tahun ini berikutan permintaan dari China dan India.

"Secara teknikal, kami meletakkan harga CPO yang lebih tinggi iaitu pada RM3,000 pada pasaran.

"Namun demikian, saya melihat harga tidak akan turun di bawah paras RM2,600 pada suku keempat tahun ini," tambahnya.

Menurut Majlis Minyak Sawit Malaysia (MPOC), eksport sawit ke AS dari Januari hingga Ogos tahun ini menurun sebanyak 11 peratus berbanding tempoh sama tahun lalu.

Bagaimanapun, eksport ke China, Korea Selatan, Netherlands dan Pakistan mencatatkan peningkatan.

**© 2020 Astro Awani Network Sdn. Bhd.
(535275-D) All Rights Reserved.**

Source: <https://www.astroawani.com/berita-malaysia/as-sekat-import-minyak-sawit-fgv-tidak-beri-impak-signifikan-kepada-industri-malaysia-261666>